

**PEMBERITAHUAN PERTANYAAN**

**DEWAN RAKYAT, MALAYSIA**

**DARIPADA : Y.B. TUAN AHMAD MARZUKI BIN SHAARY  
(BACHOK)**

**PERTANYAAN : LISAN**

**TARIKH : 01.12.2015**

**Y.B. TUAN AHMAD MARZUKI BIN SHAARY [ BACHOK ]** minta **MENTERI KEWANGAN** menyatakan sejauh mana keberkesanan pelaksanaan Cukai GST dalam memacu dasar fiskal negara. Berapakah jumlah kes-kes penipuan GST yang dilaporkan, didakwa dan disabitkan kesalahan.

**JAWAPAN**

Tuan Yang di-Pertua,

Kerajaan telah melaksanakan cukai barang dan perkhidmatan (GST)

bermula 1 April 2015, sejajar dengan usaha mempelbagaikan sumber hasil khususnya hasil cukai dan mengurangkan kebergantungan kepada hasil berasaskan komoditi, khususnya petroleum. Dengan pelaksanaannya, hasil GST pada tahun 2015 dianggar berjumlah RM27 bilion, manakala bagi tahun 2016, unjuran hasil GST adalah sebanyak RM39 bilion. Kutipan hasil GST ini dijangka dapat mengimbangi pengurangan hasil berkaitan petroleum berikutan kejatuhan harga minyak mentah global sejak tahun 2014. Kedudukan hasil GST ini telah memberi keupayaan kepada Kerajaan untuk meneruskan usaha konsolidasi fiskal bagi memastikan kemampamanan fiskal jangka panjang negara.

2. Kemampamanan fiskal adalah penting bagi mengekalkan daya tahan ekonomi negara, mewujudkan ruang fiskal (*fiscal space*) untuk melaksanakan program dan projek pembangunan, seterusnya memastikan kesejahteraan rakyat. Kerajaan kekal komited terhadap konsolidasi fiskal dengan mengurangkan defisit secara berperingkat ke arah mencapai bajet berimbang pada tahun 2020. Kerajaan akan terus melaksanakan program pembaharuan fiskal (*fiscal reform*) bagi mengukuhkan kedudukan kewangan dan memastikan kemampamanan fiskal jangka panjang negara.
3. Untuk makluman Ahli-ahli Yang Berhormat, sejak pelaksanaan GST

pada 1 April 2015, penguatkuasaan di bawah Akta Cukai Barang dan Perkhidmatan 2014 telah giat dilaksanakan oleh Jabatan Kastam Diraja Malaysia (JKDM). Sehingga Oktober 2015, sebanyak lapan kes kesalahan yang dilakukan oleh orang berdaftar telah didakwa di mahkamah. Daripada jumlah ini, sebanyak tiga kes yang melibatkan seksyen 33, Akta Cukai Barang dan Perkhidmatan 2014 iaitu kesalahan dari segi pengeluaran invois cukai. Dua kes masih dalam proses perbicaraan manakala satu kes telah selesai yang melibatkan denda sebanyak RM10,000.

4. Selain daripada itu, terdapat sebanyak tiga kes bagi kesalahan di bawah seksyen 184, Akta Cukai Barang dan Perkhidmatan 2014 iaitu kesalahan yang melibatkan kegagalan syarikat yang telah mencapai nilai ambang (*threshold*) pada bulan April 2015 untuk mendaftar sebelum tarikh efektif pelaksanaan cukai barang dan perkhidmatan. Kesemua kes telah selesai di mahkamah dan melibatkan jumlah denda sebanyak RM20,000.

5. Di samping itu, Kementerian Perdagangan Dalam Negeri, Koperasi dan Kepenggunaan (KPDKKK) juga telah melaksanakan penguatkuasaan di bawah Akta Kawalan Harga dan Antipencatutan (AKHAP) 2011 dan

Peraturan-peraturan Kawalan Harga dan Antipencatutan (Mekanisme Untuk Menentukan Keuntungan Tinggi Yang Tidak Munsabah) (Margin Keuntungan Bersih) 2014 bagi membendung kenaikan harga dan aktiviti mengambil kesempatan membuat keuntungan tinggi (*profiteering*) yang tidak munasabah.

Sehingga 26 Oktober 2015, sebanyak 134 kertas siasatan telah dibuka bagi kesalahan di bawah Akta Kawalan Harga dan Antipencatutan 2011 iaitu:

- i. 87 kertas siasatan di bawah Seksyen 14(1) kerana mencatut;
  - ii. 43 kertas siasatan di bawah Seksyen 21(5) kerana enggan atau gagal memberi maklum balas kepada notis yang dikeluarkan; dan
  - iii. 4 kertas siasatan di bawah Seksyen 53A kerana tidak menyimpan rekod perniagaan.
6. Daripada jumlah tersebut, sejumlah 14 kertas telah didakwa di Mahkamah Khas Antipencatutan iaitu 12 kes telah disabit kesalahan masing-masing 7 kes di bawah Seskyen 21(5) dan 5 kes di bawah Seksyen 14(1) dengan jumlah keseluruhan denda RM365,500. Sebanyak 2 kes lagi

yang telah dituduh dan masih dalam tindakan pendakwaan di Mahkamah. Sebanyak 13 kes pula telah dikompaun iaitu masing-masing 10 kes di bawah Seksyen 14(1) dan 3 kes di bawah Seksyen 21(5) AKHAP 2011 dengan jumlah keseluruhan kompaun RM535,000.

Sehingga kini, sejumlah 958 daripada 2,170 Notis di bawah Seksyen 21, Akta Kawalan Harga dan Antipencatutan 2011 telah dikeluarkan terhadap peniaga untuk mendapatkan penjelasan dan justifikasi punca kenaikan harga atau caj yang tidak munsabah yang masih dalam siasatan kerana disyaki mencatut. Tindakan akan terus dipertingkatkan bagi memastikan pelaksanaan GST adalah berkesan dan memanfaatkan rakyat.